

**AKASHVANI AIZAWL**  
**REGIONAL NEWS UNIT**  
**REGIONAL NEWS BULLETIN**  
**(MIDDAY)**



**COMMON QUESTION**

School Education Minister Dr Vanlalhlana chuan Mizorama zirnain hma a sawn theih nan tun session third term atangin zirlaiten zawhna inang an chhan dawn thu leh, Government, Deficit leh Adhoc Grant in aid school pawl 5 atanga pawl 8 zirlaiten zawhna inang hi an chhan dawn thu a sawi.

Nimina Khawrihnim Primary School Centenary lawmna Khawrihnim Primary School tual zawla neih a hmanpuinaah he thu hi sawiin Minister chuan zawhna inang chhan chuan zirnaah a tha zawngin danglam a, a siam dawnani ati a, zirna lama tan lak a ngaih thu sawiin hemi tur hian khawtlang hruaitute, tlawmngai pawlte leh nu leh pate bakah, veng chhung tanrual a ngai ani ati a, hengte hi an tanrual chuan MLA te pawhin an hawisan thei lova, sorkar leh mipui tanho a tul a ni a ti.

Minister chuan social media-in khawpui leh thingtlang mipui a run nasat thu leh smartphone leh TV te khawih chin tawk neih a ngaih thu a sawi a. Nu leh pate'n hmasawna thil chi hrang hrang tam zelah mawhphurhna an neih belh zel tih an hriat a tul thu sawiin, nu leh pate chu an fate thil zir ngaihvenpui turin a chah a. Zirtirtute pawh thil thar hmu chhuaktu leh siamchhuaktu an nih thu leh syllabus mila thil thar zirtir thei turin a chah bawk a ni.




**DURTLANG ROAD**

UD&PA Minister Pu K. Sapdanga hovin nimin khan Bawngkawn leh Durtlang inkar kawng, cheng vbc 15 senga chei that dan tur enfiah ani.

UD&PA department bultuma Bawngkawn leh Durtlang inkar kawng chei thatna tur atan hian cheng vbc 15 sanction niin, tender chhuah mek a ni a. Nimin khan UD&PA Minsiter Pu K. Sapdanga hovin AMC hotute, UD&PA thuneitute leh veng pahnih khawtlang hruaitute'n kawng chei that dan tur an enfiah a, ruahman dan chuan khualzin leh khawtual mite tana tlawh chakawm tak tur siam a ni dawn a, kawng thlang lam hmun hrang hrangah khawthlirna, hahchawlhna, open gym, naupang tualchaina leh inthiarna hmunte siam a ni dawn a, hnathawh tan atanga kum khat chhunga zawhfel theih beisei a ni.

Hei bakah hian Leitan atanga Leitan te (Synod Hospital bul), chu lirthei kaltlang theiha siam tum a ni a, hemi atan hian cheng nuai 120 vel ruahman niin, tunkar chho ah hna tan hman beisei a ni.



## **BCM ABC**

Zirtawpni atanga tan, Mizoram Baptist Kohhran hnuai a thuneitu sang Area Baptist Council (ABC) 17-te inkhawmpui chu zanin hian a tiak ang.

Lunglei South Area Baptist Council (ABC)-ah chuan vawiin Pathianni chawhma inkhawmah Kohhran Upa atan mi 16 ,Rev. Lalremsiama Ralte-in a nemnghet a, Presiding Minister Rev. Lalremsiama hian Kohhran Upa nihna hi eng pawl leh eng institution in an pek mai mai theih a ni lo tih sawiin, a pawimawh em em ani ati a, an Term pawh engemawchen atan lek ni lovin , damchhung atana nemngheh an ni tih sawiin, hetiang kal hi BCM chuan tha a la ti a, a la kalpui reng dawn a ni a ti. Tu te emaw sorkar emaw in an ordination hi an hlihsak mai mai theih pawh a ni lo tih sawiin Kohhran pawn lamah sumdawn na-ah a ni emaw Politics leh thil dangah ani emaw, thangthat lak na'n hman chi a ni lova, Kohhran upa, Pastor leh rawngbawltu nihna ang ni lovin nitin nun leh thiltih leh Lalpa hnen a inpekna hian a hril zawk tur a ni a ti.

An rorel langsar zingah BCM hian Bible Commentary, Study Bible leh Bible Dictionary te Mizo tawng a siam ni rawh se tih te, Zoram chu sualna hrang hrangin a chim a, sualna ti rem tur hian Kohhran in theitawp a chhuah chung pawhin a sawt mawh hle a, chuvangin chhungkua a bultan leh turin Kristian chhungkaw Campaign neih leh nise tih te, BCM Counselling Centre-ah Trained Counsellor leh Psychology lam a thiamna nei dah ni setih te a tel a, BCM in Counselling Centre a dinah Depression, Mood disorders,, anxiety disorders, ramhuai tihbuai leh khawhring nei a inngai te an pan nasa hle tih tarlan a ni bawk.

**(Thangmingliana Renthlei, PTC Lunglei)**



## **LADC CAMPAIGN**

December 3 a Lai Autotomous District Council (LADC) inthlan awm turah State Election Commission ruahmanna hnuai a thuneituten tluang takin inthlang tura inbuatsaihna an kalpui mek a, Political Party leh Candidate leh an mahni puitute pawhin theitawp chhuahin vote an zawng mek.

Bial 25 awmna LADC ah hian Campaign boruak in a vung vanglai a hawlh chho tan a. Candidate leh an mahni puitute chu In tinah luta, an mahni vote tura ngen chu Campaign hmanrua hman rim leh langsar ber niin, Political Party ten Star Campaigner an ruatte'n theitawp an chhuah mek bawk. Chief Minister Pu Lalduhoma leh MNF President Pu Zoramthanga te pawhin LADC Inthlan atan beihpui thlakin Lawngtlai an tlawh tawh. MPCC Vice President Pu C.Ngunlianbunga chuan thutchilhin an party candidate te a campaign pui mek a, amah pawhin Lawngtlai Vengpui bial a chuh ani.

Inthlan Campaign-ah, hmun dang atanga an hruaitu lian ten an tlawh a nih loh chuan pawnlamah boruak sang leh ri hut hut hriat tur a awm lova. Lawngtlai khawpui bikah khawlai ah vote dilna lehkha tar awm zeuh zeuh mahse, tun dinhmun ah chuan hmuhtur a la tam lova. A bikin khawpui pawn lam a, khawlai dungah party flag, poster leh banner intar erawh hmuh tur a awm nual ani. Bial hrang hrang atangin Model Code of Conduct bawhchhiatna lian tham thleng hriat tur a awm lova, pawnlamah boruak lian tak awm lova a lan lai-in, Candidate leh an mahni puitute chuan rusum an thlak vanglai tak a thleng chho mek thung ani.

**(Lalngbeta Ralte, PTC Lawngtlai)**

